



E-BILTEN

SAVEZA OPĆINA I GRADOVA FEDERACIJE BOSNE I HERCEGOVINE

Petak, 21.01.2011. godine

Br. 104

Aktuelnosti:

1. Vlada Švajcarske i Caritas pomažu stanovništvo ugroženo poplavama
2. Općina N.Grad izdvaja 8 miliona KM za infrastrukturne projekte
3. Projekat LOD II organizirao otvorene dane
4. Održan sastanak Saveza sa predstavnicima SSST
5. U Cazinu održan kolegij načelnika USK-a
6. Općina Centar pomaže poplavljena područja
7. Sastanak oficira za vezu Nalas-a
8. Ambasada Njemačke uručila donacije porodicama ugroženim pokretanjem klizišta
9. Grad Sarajevo bit će pokrovitelj sajma NEXPO 2011
10. Potpisan ugovor za izradu projekta kanalizacije u općini Prozor/Rama
11. Otvorena nova zgrada Općine Fojnica
12. Grad Sarajevo predstavljen u publikaciji City Leaders za 2011.
13. Edukacija iz oblasti pripreme projektnih prijedloga za JLS

Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u

GLEDAJTE svake druge subote u 13:30 sati na Hayat TV – “Moje dvorište” dokumentarno informativnu emisiju o lokalnoj samoupravi.

Repriza je ponedjeljkom u 21:00 sati.



NAJAVA

MEĐUNARODNI SAJAM OPĆINA

Sarajevo, 10-11. mart/ožujak 2011

NALAS-a (Mreža asocijacija lokalnih vlasti jugoistočne Evrope, www.nalas.eu) u suorganizaciji Saveza općina i gradova Federacije BiH organizira Sajam općina i gradova jugoistočne Evrope.

Sajam će se održati u Sarajevu dvorana Zetra u periodu 10. – 11. mart/ožujak 2011. godine.

Na sajmu se očekuje učešće velikog broja delegacija jedinica lokalne samouprave iz 14 država članica NALAS-a ali i drugih gradova Evrope. Uz to veliki broj lokalnih i međunarodnih organizacija, potencijalnih investitora i poslovnih kompanija će biti predstavljeni na ovom sajmu. Ovaj događaj podržalo je i Predsjedništvo Skupštine Saveza općina i gradova Federacije BiH.

Elektronsku verziju brošure o Sajmu možete pogledati na www.nexpo.nalas.eu, a registraciju za učešće već sada možete popuniti na istoj web stranici.

Molimo Vas da izvijestite potencijalne izlagače sa područja vaše općine/grada o ovom događaju te planirate sredstva u budžetima za predstavljanje vaše općine/grada na ovom sajmu.



konferencije, seminari, okrugli stolovi a koji mogu doprinijeti unapređenju sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten prosljedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i jeftin način komuniciranja sa javnošću.

Sa zadovoljstvom očekujemo vaše komentare, sugestije i primjedbe.

[Kontaktirajte nas](#)

[Telefoni:](#)

033/ 216 502, 033/ 552 812

[Fax:](#) 033/552 810, 033/ 552 811

<http://www.sogfbih.ba>


<http://www.partnerstvogradova.ba/>

<http://www.nexpo.nalas.eu>

e-mail: dino@sogfbih.ba

NAŠ CILJ je informirati vas o seminarima, treninzima, konferencijama i drugim

ŠVICARSKA VLADA I CARITAS MREŽA DAJU PODRŠKU STANOVNIŠTVU UGROŽENOM POPLAVAMA U BIH



SARAJEVO, 20. januar/siječanj – Švicarska vlada i Caritas mreža obezbjedile su pomoć u iznosu od 159.500 eura za stanovnike općina Goražde, Novo Goražde, Bijeljina, Čapljina i Tuzla, koji su ugroženi posljednjim poplavama.

Oko 1.200 porodica dobiće pakete sa hranom, higijenski materijal, stočnu hranu, odjeću, drva za grijanje i ostale neophodne artikle.


Također, biće kupljene i iznajmljene pumpe za vodu i isušivači prostorija koje će biti iskorištene za ispumpavanje vode i isušivanje najmanje 60 kuća.

Finansijska sredstva su obezbjedili Švicarska vlade, članovi Caritas mreže – Caritas Austrije, Caritas Njemačke, Caritas Švicarske i Catholic Relief Services (CRS).

Partner za organizaciju i distribuciju pomoći je Caritas Biskupske konferencije BiH. Raspodjela pomoći će početi 31. januara/siječnja.

OPĆINA NOVI GRAD SARAJEVO ZA INFRASTRUKTURNE PROJEKTE PLANIRALA OKO OSAM MILIONA KM

NOVI GRAD SARAJEVO, 19. januar/siječanj – Budžetom Općine Novi Grad Sarajevo za 2011. godinu Općinska služba za investicije i komunalnu infrastrukturu planirala je oko osam miliona KM za realizaciju projekata kao što su investiciono i redovno održavanje cesta, izgradnja vodovodne i kanalizacione separatne mreže, hitne intervencije na objektima kolektivnog stanovanja, izgradnja igrališta i projekat sanacije izgradnje javne rasvjete.



U okviru investicionog i redovnog održavanja cesta, vršiće se rekonstrukcija, održavanje, popravka ulica, trgova, mostova, lokalnih puteva i pješačkih staza.

Općinsko vijeće će na redovnoj sjednici usvojiti listu prioriteta cesta koje treba raditi.

Osim pomenutog, Općina i Direkcija za puteve Kantona Sarajevo (KS) finansiraće izradu projektne dokumentacije za izgradnju A-transferzale.

Također, planirana je izgradnja primarnog i distributivnog vodovodnog sistema, regulacija vodotoka, te izgradnja separatne kanalizacione mreže.

U tekućoj godini za sanaciju i izgradnju javne rasvjete planiran je isti iznos sredstava kao i prošle godine.

Krajem decembra prošle godine završen je projekat javne rasvjete i osvijetljeno 115 pasaža u zgradama kolektivnog stanovanja koji se realizuje u saradnji sa Zavodom za izgradnju KS.

lokalnu upravu i kadrovsko
jačanje zaposlenih u vašim
općinama.

KORISNI LINKOVI ZA PREDPRISTUPNE FONDove:

<http://www.southeast-europe.net/en/>

<http://www.adriaticpacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmemed.eu/>

<http://www.tacso.org/>

<http://www.euroinfocentar.ba/>

<http://www.balkanfund.org/>

LOD II PROJEKAT ORGANIZIRAO OTVORENE DANE



Evropska unija



Ministarstvo pravde
BiH



Bosna i
Hercegovina

Projekat Jačanje lokalne demokratije/demokracije II - LOD II objavio je Javni poziv za izražavanje interesa kojim se pozivaju općine iz Bosne i Hercegovine za učešće u projektu koji, između ostalog, ima za cilj unaprijeđivanje saradnje između jedinica lokalne samouprave i organizacija civilnog društva. U sklopu promocije Javnog poziva LOD II projekat je organizirao "otvorene dane" u Mostaru, Sarajevu i Tuzli, dok će se sljedeći sastanak održati u Banja Luci 26.01.2011. godine u hotelu Bosna u periodu između 10.00-14.00 sati.

Cilj promocije je obezbijediti više informacija o procesu prijave za LOD II, te izboru partnerskih općina, putem direktnih razgovora sa zainteresiranim predstavnicima.

Za dodatne informacije i pojašnjenja molimo vas da vaše zahtjeve uputite pismenim putem na fax: 033/552 330 ili elektronskom poštom: registry@undp.ba

Krajnji rok za izražavanje interesa (prijem aplikacija) je 07.02.2010. godine.

LOD II finansira Evropska unija u iznosu od 1,5 miliona eura, a implementira ga Razvojni program Ujedinjenih nacija (UNDP) u Bosni i Hercegovini. Projekat traje 18 mjeseci.

ODRŽAN SASTANAK SAVEZA SA PREDSTAVNICIMA SSST



SARAJEVO, 19. januar/siječanj – U prostorijama Saveza općina i gradova Federacije BiH, 19. januara/siječnja održan je sastanak sa predstavnicima Sarajevo School of Science and Technology (SSST). Na sastanku se razgovaralo o načinima i mogućnosti izrade projekta digitalizacije kulturnog naslijeđa općina u Federaciji Bosne i Hercegovine.

Gđa Selma Rizvić, profesor na Univerzitetu SSST prezentirala je primjer virtualne konstrukcije objekta kakav bi se koristio prilikom digitalizacije kulturnog naslijeđa u Bosni i Hercegovini.

Slijedom potpisanog Memoranduma o razumjevanju između SSST i Saveza dogovoreno je da u narednom periodu Savez izvrši anketiranje općina o zainteresiranosti za učešće u projektu ovakve vrste.

U CAZINU ODRŽAN KOLEGIJ NAČELNIKA USK-a

U utorak 18. januara/siječnja u Općini Cazin održan je sastanak kolegija općinskih načelnika Unsko – sanskog kantona. Okupljanje načelnika USK-a postala je redovna praksa, koja je rezultirala nekim zajedničkim akcijama i nastupima na terenu.

Ovom sastanku nije prisustvovao jedino načelnik Općine Sanski Most, ali je svoj izostanak opravdao ranije preuzetim obavezama, a umjesto njega prisustvovao je njegov savjetnik. Sastanku je prisustvovao i predstavnik BH MAC - Aladin Bajrektarević, šef Regionalnog ureda u Bihaću.

Prema unaprijed dogovorenim i usaglašenim dnevnim redovima načelnici su

raspravljali o nekoliko aktuelnih tema.

U prvom redu se raspravljalo o pitanju deminiranja na području USK-a i mogućim izvorima finansiranja. Aladin Bajrektarević, predstavnik BH MAC, upoznao je prisutne sa problemom deminiranja, koji se uglavnom svodi na izvore finansiranja. Naime, potrebno je da se općine i kanton uključe u finansiranje



deminiranja, odnosno da svojim budžetom predvide sredstva za ovu svrhu. Zanimljiv je podatak da od ukupne površine područja USK-a čak 3% predstavlja „sumnjivu teritoriju“. Uređena strategija deminiranja u BiH predviđa da se proces uklanjanja zaostalih mina u državi okonča 2019. godine, a za tu svrhu potrebno je 35 miliona maraka, od čega za USK 3,5 miliona. Zaključak sa ovog sastanka je da sve općine predvide svojim budžetom sredstva za ovu svrhu i da se ide inicijativom prema novoj Vladi da i ona isto uradi.

Drugo pitanje dnevnog reda bilo je problem pasa lotalica. Psi lotalice predstavljaju problem svih općina, koji ozbiljno zabrinjava općinske načelnike. Prema riječima Albina Muslića, općinskog načelnika Općine Bihać, u Bihaću se planira otvaranje azila u Vedrom polju, zgrada Poljoprivrednog zavoda, za koji je urađeno idejno rješenje. Na sastanku je dogovoreno da bi to mogao biti zajednički azil za pse lotalice svih općina sa područja USK-a, ali je za uređenje i rekonstrukciju zgrade potrebno osigurati cca 400.000,00 KM. Na prijedlog Admila Mulalića, načelnika Općine Velika Kladuša na sastanku je donesen zaključak da se pokrene i inicijativa za ocjenu ustavnosti Zakona o zaštiti i dobrobiti životinja.

Kolegij načelnika je također raspravljao i o problemu naplate koncesija na nivou USK-a. Naime, na području našeg kantona 78 osoba se bavi eksploatacijom, od kojih su samo 23 osobe potpisale Ugovor o koncesiji. O ovom pitanju donesen je zaključak da se ide inicijativom prema novoj Vladi da se naplaćuju naknade za koncesije i da općine ne daju nove koncesije, dok se ne plate neizmirene obaveze. Načelnik općine Bosanski Petrovac, koji je i član predsjedništva Saveza općina i gradova FBiH sa Unsko-sanskog kantona, upoznao je kolege s aktuelnostima u Savezu, te preuzeo obavezu da zaključke s Kolegija uputi i prema Predsjedništvu Saveza.

Na prijedlog Admila Mulalića, općinskog načelnika Općine Velika Kladuša na sastanku je dogovoreno da se održi sastanak svih načelnika poslije 20.01.2011. godine, na kojem bi se razgovaralo o problemu Agrokomerca.

Domaćin slijedećeg saziva kolegija načelnika biti će Općina Sanski Most.

POMOĆ POPLAVLJENIM PODRUČJIMA

Općina Centar donirala 140.000 KM za pomoć Goraždu i Foči

CENTAR SARAJEVO, 17. januar/siječanj – Nakon što je početkom decembra/ prosinca prošle godine među prvima intervenisala i pružila pomoć u ljudstvu i opremi prilikom spašavanja ljudi i materijalnih dobara u općinama Goražde i Foča-Ustikolina koje su zadesile katastrofalne poplave, Općina Centar je još jednom iskazala volju za



pomoć unesrećenom stanovništvu poplavljenih područja.

Po odluci Općinskog vijeća Centar na 23. redovnoj sjednici, održanoj 30. decembra/prosinca 2010. godine, iz budžeta Općine Centar izdvojeno je 140.000 KM za pomoć u saniranju šteta od poplava u Goraždu i Foči.

Tim povodom je načelnik Općine Centar Dževad Bećirević sa svojim pomoćnicima Sulejmanom Sijarićem - za civilnu zaštitu i Adilom Katicom - za lokalnu samoupravu, te vijećnikom u Centru Muhamedom Cocalićem i komandantom Dobrovoljnog vatrogasnog društva „Bjelave“ Sulejmanom Vrancem posjetio 14. januara 2011. godine Goražde. Tom prilikom je Dževad Bećirević sa načelnicima općina Goražde i Foča-Ustikolina potpisao protokole o dodjeli novčanih sredstava i to 100.000 KM općini Goražde i 40.000 KM za općinu Foča-Ustikolina. Sredstva će biti uložena u popravku kuća i sanaciju šteta na porodičnim objektima.

Zahvalnost u ime stanovnika poplavljenih područja uputio je načelnik Općine Goražde Muhamed Ramović, koji je naglasio da je Općina Centar u više navrata, a naročito u kriznim situacijama pokazala spremnost i odazvala se na apele za pomoć onima kojima je bila najpotrebnija. Tako je bilo i sa apelom Goraždana na koji su se mnogi odazvali, i po uzoru na Općinu Centar, iskazali solidarnost i razumijevanje.

U toku posjete Goraždu načelnik Općine Centar Dževad Bećirević sa saradnicima je, u sklopu otvaranja sedme po redu kulturne manifestacije „Dani Isaka Samokovlije – Sunce nad Drinom“, položio cvijeće pred bistu velikog književnika i humaniste Isaka Samokovlije, inače rođenog Goraždanina.

SASTANAK OFICIRA ZA VEZU NALAS-a



U Sarajevu, 15. januara/siječnja održan je sastanak oficira za vezu Nalas-a. Organizacija Nalas predstavlja mrežu lokalnih vlasti Jugoistočne Evrope koju čini 15 asocijacija lokalnih vlasti iz 12 zemalja Jugoistočne Evrope.

Na sastanku se razgovaralo, između ostalog o organizaciji Sajma općina i gradova Jugoistočne Evrope, Nexpo 2011. Govorilo se o dosadašnjim realiziranim aktivnostima na pripremi sajma i onome šta treba uraditi u narednom periodu. Učesnici su izrazili zadovoljstvo dosadašnjim brojem aplikacija za učešće na sajmu i nadaju se da će svi osigurani štandovi biti popunjeni.

Ovo je prvi sajam ovakve vrste, a održat će se u martu/ožujku 2011. godine u Sarajevu, gdje će se predstavnici lokalnih samouprava iz cijele Jugoistočne Evrope prezentirati i razmijeniti svoje prakse, te uspostaviti međusobnu komunikaciju. Za

učešće u Sajmu do sada se prijavilo više općina iz Bosne i Hercegovine, uže i šire regije, zatim učešće su potvrdile delegacije iz Moldavije, Kine i drugih zemalja. Nexpo 2011. je jedinstvena prilika za predstavnike lokalnih vlasti da podijele svoje uspjehe, steknu nova saznanja i istraže nove tehnologije koje se nude na tržištu. Također, na marginama ovog sastanka održat će se i susret gradonačelnika Grada Sarajeva Alije Behmena sa Predsjednikom Nalas-a, Vladimirom Moskowim, potpredsjednikom, Ozgenom Keskinom i direktoricom Saveza općina i gradova Federacije BiH, Vesnom Travljanin.

DELEGACIJA AMBASADE NJEMAČKE U BIH URUČILA DONACIJE PORODICAMA POGOĐENIM POSLJEDICAMA AKTIVIRANJA KLIZIŠTA



**Deutsche Botschaft
Sarajewo**

**Njemačka Ambasada
Sarajevo**

MAGLAI, 14. januar/siječanj – Delegacija Ambasade Njemačke u BiH posjetila je Maglaj, gdje se informisala o aktuelnoj situaciji porodica koje su u ljeto prošle godine pogođene posljedicama aktiviranja klizišta, te im je predala dvije donacije namijenjene socijalnim projektima.

U maglajskom naselju Suljakovići se u julu prošle godine aktiviralo klizište, usljed čega je više porodica ostalo bez krova nad glavom.

Neposredno nakon aktiviranja klizišta Vlada Njemačke je pružila interventnu pomoć od 25.000 eura.

Ova sredstva iskorištena su za nabavku prehrambenih artikala, peći, ogrjeva, odjeće i obuće i školske opreme pogođenim porodicama.

Većine porodica je zbog aktiviranja klizišta izgubila cjelokupnu egzistenciju.

Interventna pomoć koju je pružila Ambasada Njemačke omogućava porodicama da prežive zimu.

"Obavezu za iznalaženje dugotrajnijeg rješenja imaju Općina i Federacija BiH. Žalosno je što pažnja javnosti za muke ovih porodica tako brzo slabi", izjavio je rukovodilac privrednog odjeljenja Ambasade Njemačke u BiH Matijas Hajnc (Matthias Heinz).

Ovom prilikom je delegacija prihode koji su ostvareni na tradicionalnom njemačkom Božićnom bazaru, a koji je organizovan za vrijeme Adventa kod Štaba vojnog atašea Ambasade Njemačke, predala Dnevnom centru Maglaj, kojim upravlja udruženje "Humanost".

Pukovnik Generalnog štaba Ingo Gnoyke uručio je ček od 5.796,35 KM.

Ovim novcem finansiraće se uređenje radionice u Dnevnom centru za djecu s posebnim potrebama i omladinu.

Takođe, Matijas Hajnc predao je JU "Dječiji vrtić" Maglaj donaciju Dobrotvornog udruženja "Brot und Bucher" (Hljeb i knjige) iz Njemačke u vrijednosti od 6.300 KM. "Namjera Udruženja je bila da nagradi izvanredan angažman rukovodstva vrtića i da pruži podršku najmađim članovima društva", rekao je Hajnc.

GRAD SARAJEVO BIĆE POKROVITELJ SAJMA OPĆINA I GRADOVA JUGOISTOČNE EVROPE – NEXPO 2011.



SARAJEVO, 14. januar/siječanj – Zamjenik gradonačelnika Grada Sarajeva Miroslav Živanović i sekretar Gradske uprave Milorad Kojović primili su danas delegaciju Mreže lokalnih vlasti Jugoistočne Evrope – NALAS i Saveza općina i gradova Federacije BiH sa kojima su razgovarali o organizaciji Sajma općina i gradova Jugoistočne Evrope – NEXPO 2011. Ovaj sajam održat će se 10.-11. marta a pokrovitelj će mu biti Grad Sarajevo. „Za nas je vrlo važno održavanje ovog sajma jer će se na njemu predstaviti lokalne zajednice iz regiona, tretirat će se aktuelna situacija u Jugoistočnoj Evropi i uputiti određene poruke prema Evropskoj uniji.“, istaknuo je Vladimir Moskov, predsjednik NALAS-a koji je zahvalio Gradu Sarajevu što podržava organizaciju jednog ovako velikog i značajnog događaja.

Dogradonačelnik Živanović rekao je da je Grad Sarajevo odmah prepoznao važnost ovog skupa i već pokrenuo određene aktivnosti sa Savezom općina i gradova FBiH koje se tiču njegove organizacije. Pored toga što će se Grad Sarajevo zajedno sa četiri gradske općine predstaviti na sajmu, pružit će i svu neophodnu tehničku i drugu podršku kako bi sajam protekao uspješno. Tako će press služba Grada obavještavati medije i javnost o svim dešavanjima na sajmu, kao i prema univerzitetima i civilnom društvu, a gradski protokol će biti po potrebi zadužen za asistiranje.

Na sajmu bi se trebalo predstaviti više od 100 općina i gradova Jugoistočne Evrope.

POTPISAN UGOVOR ZA IZRADU GLAVNOG PROJEKTA KANALIZACIJE OTPADNIH VODA

PROZOR/RAMA, 13. januar/siječanj – Načelnik općine Prozor-Rama Jozo Ivančević i dekan Građevinskog fakulteta Sveučilišta u Mostaru prof. dr Mladen Glibić potpisali su ugovor za Izradu glavnog projekta kanalizacije otpadnih voda i uređaja za pročišćavanje otpadnih voda.

Prema riječima načelnika Ivančevića, ugovor je vrijedan 68.500 KM, a sredstva će biti osigurana iz budžeta općine.

Načelnik je istakao kako uskoro očekuje potpisivanje ugovora i za izradu glavnog projekta vodovoda u Prozoru, čime će se konačno stvoriti uslovi za izgradnju boljeg i ljepšeg izgleda Prozora.

Naime, Prozor nikada nije imao kvalitetno riješno pitanje kanalizacije, a dotrajali postojeći vodovod u gradskom području Prozora više ne može zadovoljiti potrebe

samog grada, ali i zbog velikih gubitaka vode on je postao neodrživ. S ova dva projekta početak će temeljna rekonstrukcija grada, te će u narednim godinama Prozor postati veliko gradilište, najavljuju iz Općine Prozor-Rama.

OTVORENA NOVA ZGRADA OPĆINE FOJNICA



FOJNICA, 13. januar/siječanj – Jučer je svečanim presjecanjem vrpce općina Fojnica po prvi put u svojoj historiji dobila vlastitu zgradu Općine. Prije samog otvaranja nove zgrade himnu Evropske unije "Odu radosti" su izveli članovi škole gitare OŠ "Muhsin Rizvić" i "Ivan Goran Kovačić" Fojnica.

Vrpcu su presjekli Američki i Holandski ambasadori u BiH Patrik Mun (Patrick Moon) i Sveder van Vorst tor Vorst (Sweder van Vorst tor Voorst) i načelnik općine Fojnica Salkan Merdžanić. Svečanom činu presjecanja vrpce nove zgrade Općine Fojnica su prisustvovali predstavnici političkog, javnog, kulturnog i vjerskog života općine Fojnice, donatori, izvođači radova i preko hiljadu građana općine Fojnica. Otvaranjem nove zgrade Općine Fojnica i uspostavljanjem moderno opremljenog i multifunkcionalnog Centra za pružanje usluga građanima općina Fojnica će funkcionirati znatno bolje i obezbjeđivati kvalitetnije i efikasnije usluge građanima i investitorima i time ujedno otpočeti novu eru djelovanja organa lokalne samouprave u povećanju transparentnosti rada kao jednog od osnovnih demokratskih načela svih evropskih država. Prije tri godine je započela obnova i rekonstrukcija nove zgrade Općine Fojnica, nekadašnjeg motela "Jezero" u Fojnici. Zgrada je urađena novim projektom po principu koji nalaže Evroska unija i međunarodni propisi a to znači da na 500 stanovnika ide jedan zaposlenik. Nova zgrada Općine Fojnica je objekat koji je projektovan za razvoj općine Fojnica za narednih 30 godina kada se pretpostavlja da će potrebe općine biti 87 zaposlenih u općinskim službama Općine Fojnica. Trenutno je u Općini Fojnica uposlono 50 zaposlenika.




Realizaciju ovog značajnog projekta su pomogle Američka agencija za međunarodni razvoj (USAID), Švedska agencija za međunarodni razvoj i saradnju

(SIDA), Ambasada Kraljevine Holandije u BiH (EKN), Vlada FBiH kroz Fondaciju održivog povratka (ODRAZ), Vlada SBK i drugi. Ovaj objekat je dio projekta druge faze Projekta upravne odgovornosti (GAP II). Tokom protekle tri godine, GAP I je osigurao podršku 41 općini širom BiH u izgradnji kapaciteta i unaprijeđenju razine usluga koje pružaju građanima. Novih 30 općina učestvuje u sličnim aktivnostima u drugoj fazi projekta GAP. Od 64 kapitalna projekta koja se realiziraju u 39 općina, lokalne vlasti učestvuju sa 69 posto, ili 8,3 miliona dolara, što značajno prelazi dogovorenih 50 posto učešća.

Za rekonstrukciju i obnovu ovog objekta sredstva su osigurali GAP 215 000 US dolara, Općina Fojnica 307 000 US dolara, od čega je 105 000 dolara obezbjedila Organizacija za održivi razvoj u FBiH (ODRAZ). Ukupna vrijednost ovog projekta je oko 1.800.000 KM.

GRAD SARAJEVO PO PRVI PUT PREDSTAVLJEN U PUBLIKACIJI „CITY LEADERS“ ZA 2011. GODINU



Sarajevo, 12. januar/siječanj – Grad Sarajevo je po prvi put predstavljen u publikaciji „City Leaders“ za 2011. godinu, u organizaciji PropertyEU i MIPIM World-a, organizacija koje djeluju na globalnom nivou sa svrhom razvoja tržišta nekretnina i razvoja glavne baze podataka za investitore širom svijeta. „City Leaders“ prezentira 100 vodećih evropskih gradova koji predstavljaju dio zajedničkog tržišta za međunarodne investitore. Prema City Leaders metodologiji grad Sarajevo je svrstan u „REINVENTED CAPITALS“, što znači da Sarajevo ulazi u red vodećih tranzicijskih prijestolnica sa velikim potencijalom i šansama za dinamičan ekonomski razvoj. City Leaders piše o

Sarajevu: „Izuzetan geografski položaj grada Sarajeva u Bosni i Hercegovini, te njegove klimatske, geološke, demografske i makroekonomske karakteristike, doprinijele su upravo da je Sarajevo centar javne uprave i privrede. Dobar poslovni ambijent rezultat je uspješne saradnje javnog i privatnog sektora na polju unapređenja ukupnog ekonomskog razvoja. Grad je također i glavni edukacijski centar.

Jedan od bosanskohercegovačkih prioriteta jeste i formiranje ICT inkubatora i ICT tehnoloških parkova u vodećim univerzitetskim centrima kao što je Sarajevo. Kroz Sarajevo prolaze i glavni evropski putevi, spajajući ga tako sa Budimpeštom na sjeveru i Pločama na jugu. Grad ima razvijen sistem gradskog prijevoza: trolejbusa, tramvaja i autobusa. Sarajevo zasigurno postaje glavno polje infrastrukturne obnove: mnogi putevi su obnovljeni, tramvajski sistem je u fazi modernizacije i rekonstrukcije, kao i novi mostovi i putevi.

Gradska politika je posebno usmjerena ka razvoju turizma, što je i nagrađeno preporukama časopisa „Lonely Planet“, prema kome je Sarajevo svrstano u top 10 turističkih destinacija za posjetiti u 2010. godini. Sarajevo također, kontinuirano radi na unapređenju poslovnog ambijenta grada. Gradske općine imaju biznis centre koji omogućavaju slobodan pristup informacijama, te stručnu i pravnu pomoć domaćim i stranim investitorima.“

EDUKACIJA IZ OBLASTI PRIPREME PROJEKTNIH PRIJEDLOGA ZA JEDINICE LOKALNE SAMOUPRAVE

U okviru projekta Razvojnog programa Ujedinjenih nacija (UNDP) Sistem obuke za jedinice lokalne samouprave (MTS), a u saradnji sa Projektom integrisanog lokalnog razvoja (ILD), je u toku mjeseca decembra/prosinca organizovan niz edukacija u 3 različita grada – Banja Luka, Lukavac i Zenica.

Tokom edukacija, koje su brižljivo pripremljene za službenike institucija lokalne samouprave, učesnici su kroz konkretne primjere i praktične zadatke imali priliku iz prve ruke saznati o dostupnim međunarodnim i lokalnim fondovima, o konceptu i pripremi projektnih prijedloga, planiranju budžeta, kao i o upravljanju projektnim ciklusom.

Jedan od učesnika edukacije, gospodin Suad Dizdarević, šef odsjeka Općine Zenica je naglasio kako je i ranije prošao slične edukacije, ali kako je ovo prva radionica na kojoj se podučava kroz interaktivni pristup i uz pomoć konkretnih primjera, što je za ovako apstraktnu temu jako korisno. Takođe je istakao da je obnovio svoje znanje, ali i stekao nove vještine, koja će mu itekako pomoći u budućem radu i prijavljivanju projekata za različite fondove.

Organizovane radionice će pomoći službenicima u budućem radu, kod pripremanja kvalitetnijih projekata, prilikom pripreme sveobuhvatne dokumentacije koja je potrebna za prijavljivanje projekata, kao i dobijanje neophodnih sredstava za unapređenje lokalne zajednice.

“Seminar na kome sam sudjelovala u Zenici je bio izuzetno koristan i poučan. Dobili smo sveobuhvatan pregled, vježbajući kroz konkretne situacije i primjere, od početne ideje do realizacije projekata. Sigurna sam da će nam u budućem radu ova radionica koristiti kako bismo se snašli u komplikovanim procedurama javnih poziva, te nam omogućiti i da unaprijedimo situaciju u svojim lokalnim zajednicama”, kazala je Arijana Šabanović, viša stručna saradnica, u Općini Novi Travnik.
